

1 Tesalonike

Pauloŋe Tesalonike yeŋgât ekap aŋgoân kulemgum katyŋgiop.

1 ¹O bukulipnenŋe,
Yen Tesalonike kapi ambolipŋaŋe Kutdânenŋe Yesu Kiristohâlebiwiyeŋaŋe kepeim manmai. Yakât otmâ Awoŋnenŋe Anitâ yet Kutdânenŋe Kiristo orop biwiyeŋaŋe hikuakmâ konohâk otmu manmai. Nenâmâ Paulo, Sila, otmu Timoteo. Nenŋe yeŋgât nâŋgâm ekap yu kulemgum katyŋgiain.

Awoŋnenŋe Anitâ otmu Kutdânenŋe Yesu Kiristoŋe eŋgatyeteŋeâk nâŋgâyiŋgim tihityeŋe otdomawot. Yawu otmutâ biwi nâŋgân nâŋgânyeŋaŋe hikuakmâ konohâk otmâ sânduk sâm gaekgât Anitâ ulitgumain.

Tesalonike yeŋgât manmanyeŋe yakât sâop.

²⁻⁵Emelâk nenŋe yeŋgâlen puwâk taka Kiristohât den pat âlepŋe ekyongowin. Ekyongomunŋe Wâtgât mâmâŋahât Heakŋe biwiyeŋan kioŋmâ mem heweweŋ tuhuyekmu den ya nâŋgâŋetâ bulâŋe olop. Yâhâ den ekyongowin yan Wâtgât mâmâŋahât Heakŋe biwiyeŋan ki kioŋmâ mem heweweŋ tuhuyehop mâne den ya nâŋgâŋetâ tâŋât otbâp. Yawu gârâmâ den ya ekyongomunŋe nâŋgâŋetâ bulâŋe otmu Kiristohâlen biwiyeŋaŋe kepeim tem lâuwanggiwi. Yâkâlen biwiyeŋaŋe kepeim bukulipyeŋe orop buku oraŋgim manbi. Yawu manmâ lohimbi belângen mansai ya den pat âlepŋe ekyongoŋetâ nâŋgânomaihât Kiristo hoŋ bawangim hâhiwin nâŋgâm gai. Otmu Kiristoŋe âwurem ge meyekmâ manman kârikŋan katyekbuap yakât nâŋgâm biwiyeŋe mem mansai. Otmu umatŋe âlâlâ kakyenŋan yâhâmawân ki lohotŋe otmai. Yawu manŋetâ Anitâŋe meyekmâ nine nanne baratne sâm manman kârikŋahât pat kuyŋgimu mansai yakât topŋe tetemu ekmâ eŋgat yâhâp ki otmain. Yeŋgât yawu nâŋgâm Anitâ mepaemain.

Emelâk den kâsikum yingimunje nângâjetâ bulânje otmu manman âlepñahât bulânje teteyingio. Sâp yan âlâhât wâtñan kinmâ nep mem manbin yakât topñe tetemu ekbi. ⁶Den pat ya ekyongomunje nângâm Kiristohâlen biwiyenje katbi. Sâp yapâek lohimbi belângen manmaiñe nângâm bâleyingim mem âlâlâ tuhuyekmâ gawi. Yawu otyingijetâ Wâtgât mâmâñahât Heakñe biwiyenje mem hewewej tuhumu kârihem kinmâ biwiyenje heronje olop. Yâhâ kândikum emelâk Yura nengât kunlipnenñaje Kiristohât hâkân otmâ yawuâk mem âlâlâ tuhuwi. Mem âlâlâ tuhujetâ yan yâkñe manman kârikñahât mâtâp meningiwuap yakât nângâm biwi hero nângâop. Nenñe yâkâlen biwinenñaje kepeim manmunje yakât otmâ mem âlâlâ tuhunenekmai. Yawu otningimai gârâmâ nenñe manman kârikñan mannongât nângâm biwi hero nângâmain. ⁷Emelâk yeñe kârihem kinmâ biwi hero nângâwi. Yakât otmâ Makeronia otmu Akaiâ ambolipñaje Kiristohâlen biwiyenje kepeimaiñe den pat yakât alahumai. Yakât otmâ hâmbâi lohimbi belângen manmaiñe mem âlâlâ tuhuyeknomaiân yâku yawuâk kârihem kinmâ biwi heronje nângânomai. ⁸⁻¹⁰Yengât den pat alahumai yakât topñeamâ yuwu. Anñoân nenñe yengâlen puwâk taka Kiristohât den pat âlepñe ekyongomunje nângâjetâ bulânje otmu yakât heronje nângâm mem buku tuhunenekbi. Yawu otmâ Porom Lâpio perâkñe bet pilâm Anitâ Manman bulâñahât Amboñe yâkâlen biwiyenñaje kepeim hoñ bawañgim gai. Emelâk Anitâñe ikñe nanñe, Yesu, mumuñambâ mem yahalop. Mem yahatmu himbimân yâhâmu orowâk tawot. Yakât otmâ yen orop yâkâlen biwinenñaje kepeim manmain. Yâhâ lohimbi belângen manmaiñe orotmeme bâleñe tâtâem otnomai yâhâmâ sâp patoen Anitâñe yakât matñe umatñe yingimu menomai. Yawu gârâmâ sâp yan Yesuñe himbim pilâm âwurem ge sârereyekmu Anitâñe mem manman kârikñan katyekmu manmâ yâhâmbisâi. Yakât mambotbañgimain. Lohimbiñe yengât den pat ya sâm haok tuhujetâ arimu Makeronia otmu Akaiâ kapi ambolipñe dondâhâlâkñe nañgai. Yakât otmâ Kutdâhât den pat âlepñe ya nañgai. Yakât otmâ nenñe yengât den pat yakât yâhâpñe ki ekyongonom.

Pauloñe yâk yengâlen puwâk ari olop miop yakât sâop.

2 ¹⁻²Nenñe anñoân Pilipi kapiân ari Kiristohât den pat âlepñe kapi ambolipñe ekyongomunje nombotñaje nângâjetâ nahat otmu hâim hilitnenekmâ mem bâlenenekbi yakât topñe nañgai. Otmu kapi ya pilâm yengâlen takamunje lohimbi belângen manmaiñe mâtâp mañuningim mem âlâlâ tuhunenekbi. Yawu otñetâ Anitâñe mem hewewej tuhunenekmu yâkât wâtñan kinmunje hâknenñe ki biuk sâop. Yawu otmâ Kiristohât den pat âlepñe ya ekyongomunje nângâjetâ bulânje olop. ³Otmu den pat âlepñe ekyongom biwiyenñan kionbin yan ki tâpikgum ekyongowin. Me topnenñe ki kurihakmâ den

perâkne kâityongowin. ⁴Anitâne lok biwinenne ekmapne Kiristohât den pat âlepne lohimbî ekyongonehât âi sâmbi ningiop. Yâkne nenekmu ârândân olâkgât yâkât sât lâum âi ya biwinenne tîjâk kepeim lohimbî ekyongom gamain. Yawu otmain yamâ lohimbîne nengât nângâninginetâ yahalâkgât ki nângâmain. ⁵Me dennenne nângâm tep hero nângâninginetgât ki den âlonngo lonngo otmâ biwiyen gewin. Me tewetsenne ninginetgâlâk nângâm den pat bulâne ya ki kâimboyyekbin. Yawu manmiwi yakât topne Anitâ ikniâk nangap. ⁶Bulânâk yen me lohimbî nombotne âlâne mepaeneneknetgât ki nângâwin. ⁷Kiristo iknâk âi ningim hângânnongomu ikne sâtgât otmâ den kâsikum yingim gain. Yakât otmâ yeje ewe katneneknet sâmbi ekyongombâingât dop olop yamâ nenne yawu ki ekyongowin. Yâhâ nâne namân gâtne yamâ mâmânne sisikgum nam wanmap yakât dopneâk nenne nângâyingim lohotnân otyingiwîn. ⁸⁻⁹Yawu otyingim biwinenne yengâlen kinmu den pat âlepne kâsikum yingiwîn. Otmu yeje tânnongom hâhiwin nângâmai sâmbi nenne Kiristohât den pat âlepne kâsikum yingiwîn yan nenjahâk âi tuhumbi yapâ tewetsenne mem senne âlâlâ puluhukmâ manbin. Nenne yawu otmâ hâhiwin nângâm manbin yakât topne nangai.

¹⁰Emelâk nenne yen orop manmâ Kiristohât den kâsikum yingimenne nângâwi yan nengât manman ya ekbi. Nenne Anitâhât tem lâuwangim uwawapne bia manmâ ki otmâ tâpikguwin. Yakât otmâ Anitâne nenekmu ârândân olop yawu nangain. ¹¹Otmu âwâlipyenne nimnaomlipeye wawaeyekmâ tihityenne otmai yakât dopneâk nenne yen kerek mem buku tuhuyekmâ yuwu otyingiwîn. ¹²Lohimbî nombotne biwiyenne orotok sâop ya mem hewewen tuhuyekbin. Otmu lohimbî nombotne umatne âlâlâ kakyenne yâhâop yan mem sânduk tuhuyekbin. Yâhâ Anitâneâmâ meyekmâ ikne kapi himbimân tap yan katyekbuap. Yan katyekmu manman kâriknân manmâ heronne otbângim mepaenomaihât pat kuyingim tihityenne otmap. Yakât otmâ târârâhâk mannetâ manmanyenne ekmu ârândân olâkgât ekyongowin.

¹³Angoân yengâlen taka Anitâhât den bulâne kâsikum yingiwîn ya nângânetâ yuwu olop. Den eknongonetâ nangain yuâmâ loggât nângân nângânâmbâ ki tetemu eknongoai. Yuâmâ Anitâhât den bulâne oap. Yawu sâmbi mem biwiyen katbi. Biwiyen katmâ nângânetâ biwiyenne kelihakmu yâkâlen biwiyenne tîjâk kepeim manmâ gai. Yakât nângâm haonmâ ârândân Anitâ mepaemain. ¹⁴Bukulipne, yeje Yesu Kiristohâlen biwiyenne kepeim mannetâ bukulipyenne nombotne yekmâ nângâm bâleyingim topne âlâlâ mângâeyekmâ gai. Yakât dopneâk emelâk Yura lohimbî nombotne Kiristohâlen biwiyenne katbi yan bukulipyenne nângâm bâleyingim topne âlâlâ mângâeyekbi. Emelâk Anitâne poropetelipne den ekyongomu yâkne Yura nengât tâmbâlipnenne ekyongowi. Tâmbâlipnenne den ya nângânetâ gemu bet pilâm

poropete dondâhâlâk yongojêta muwi. ¹⁵⁻¹⁶Otmu Kutdânenje Yesuje Anitâhât den ya Yura lohimbi ekyongop. Ekyongomu papatolipyejaŋe nâŋgâm bâlewaŋgim yawuâk mem âlâlâ tuhumi kuŋetâ muop. Otmu nen aposololipyejaŋe gurâ pâku lohimbi yeŋgâlen ari Kiristohât den pat âlepje ekyongomain. Ekyongomunje nâŋgâm Kiristohâlen biwiyenje katŋetâ Anitâje manman kârikŋahât pat kuyiŋgimu mansai. Yawu otmain yakât Yura papatolipnenje mâtâp maŋguningim watnenekmâ mem âlâlâ tuhunenekmai. Otmu pâku lohimbi gurâ mem ge katyekmâ mâtâp maŋguyiŋgimai. Yakât otmâ Anitâje nâŋgâmu dondâ bâlemu tâmbâlipnenje mem bâleyekmâ gawi ya bâiŋe meŋetâ pesuk yap. Yakât otmâ Anitâje matje umatje yiŋgimu umatje âlâlâ kakyenjan yâhâwuap.

Pauloŋe âwurem ari yekbom sâmi biwiŋe nâŋgâop.

¹⁷Bukulipne, Yura ambolipje miti emetŋahât galem manmai yaŋe mem âlâlâ tuhunenekmâ watnenekŋetâ pilâyekmâ takawin. Nimnaom âwâ mâmâlipyejaŋe mum pilâyekŋetâ mandu manmai. Ya lohimbiŋe yekmâ tepyeŋe nâŋgâmai. Yakât dopjeâk nenje yeŋgât kapi pilâm takawin yapâek yeŋe mandu towat mansai nâŋgâm tepnenje nâŋgâyiŋgim manmâ gain. ¹⁸Otmu pilâyekmâ takawin ya ki kâlep otmuâk âwurem taka yen yekne sâmi otbin. Yawu otmunje Satanje mâtâp maŋguningim yâhâmu hâum pâpŋum pilâm Aten kapiân tatbin. Nâje yen yekbe sâmi yawu otban. ¹⁹⁻²⁰Nenje heroje nâŋgâyiŋgim yeŋgât den pat ya lohimbi ekyongom mepaeyekmâ mansain yakât yuwu sâmune nâŋgâŋet. Nenje yeŋgâlen taka Kiristohât den pat âlepje puwâk ekyongomunje nâŋgâm yâkâlen biwiyenje kepeiwi. Yakât otmâ Kutdânenje Yesuje âwurem ge yen orop menenekmu yâkât senjan kinnom. Sâp yan yeŋgât heroje nâŋgâmunje Kiristone nâŋgâmu âlepje otbuap.

3 ¹⁻²Aiop, Yura ambolipje miti emetŋahât galem manmaiŋe watnenekŋetâ pilâyekmâ Aten kapiân taka tatbin. Otmu yen gurâ girawu mem âlâlâ tuhuyekŋetâ mansai sâmi yeŋgât nâŋgâm ketet otmâ mansain. Bukune Timoteo, orowâk manmâ Anitâ hoŋ bawâŋgim Kiristohât den kâsikum lohimbi yiŋgimain. Yakât otmâ yâkŋe yeŋgâlen taka mem hewewej tuhuyehâkŋât hâŋgâŋumune takamu nâje niniâk tatban. ³⁻⁴Emelâk nenje yen ki pilâyekmâ takawin yan yeŋe Kiristohâlen biwiyenje kepeim manŋetâ lohimbi belâŋgen manmaiŋe mem âlâlâ tuhuyeknomai yakât topje ekyongomunje nâŋgâwi. Den ekyongowin yakât bulâje yamâ mem âlâlâ tuhuyekbi yan tetemu ekbi. ⁵Mem âlâlâ tuhuyekbi yan yeŋe lohotje otmâ Kiristo betŋuŋetgât Kâitgu Kâitgu Amboŋe Satanje biwiyenjan kioŋop. Yawu olop. Yakât Kiristohât den pat âlepje imbiâk kâsikum yiŋgiwin mon sâmi gorânihimu Timoteo hâŋgâŋumune yeŋgâlen takaop.

Timoteoŋe Tesalonike ambolipŋe yengât den pat Paulo ekuop.

⁶⁻⁸Otmu yengâlembâ purik sâmbâ awurem nâhâlen takaop. Taka yeŋe Kiristohâlen biwiyenŋe tiŋâk kepeim buku oraŋgim manmâ nâhât tepyeŋe nâŋgânihimai yakât den pat eknohop. Eknongomu nâŋgâmune tepne welâmŋan giop. Yakât otmâ yengâlen takamune eŋakmâ tep hero nanŋaŋginomgât nâŋgâm gan. Yawu gârâmâ sâp yiwerenŋe yuâmâ lohimbi belângen manmaiŋe mem âlâlâ tuhunekŋetâ hâhiwin kakŋan mansan. ⁹Hâhiwin kakŋan mansan yamâ yeŋe Kutdânenŋe Kiristohâlen biwiyenŋe tiŋâk kepeim manmâ gai yakât den pat nâŋgâmune biwine hewewenŋe otmu Anitâ heronŋe nâŋgâwanŋim mepaeman. ¹⁰Emelâk Kiristohât den kâsikum yingimunŋe nâŋgâŋetâ keterakyiŋgiop. Yakât otmâ yengâlen âwurem taka yâkât den topŋambâek kâsikum yingimune nâŋgâŋetâ keterakyiŋgiâk sâmbâ Anitâ ulitgum biwinenŋe mem mansan.

¹¹Awoŋnenŋe Anitâ otmu Kutdânenŋe Yesuŋe nâŋgânihimutâ âwurem taka yekbomgât nanŋan. ¹²Anitâŋe yen mem hewewenŋe tuhuyekmu buku oraŋgim mansai yawuâk torokatmâ mannomai. Yawu manmâ biwiyenŋe kepeiakmâ konohâk otmu lohimbi belângen manmai ya gurâ nâŋgâyŋginomai. Yawu gârâmâ nenŋe yengât nâŋgâyŋginomain yakât dopŋeâk nâŋgâyŋginomaihât nanŋan. ¹³Yawu nâŋgâyŋginomai yanâmâ Anitâhât wâtŋan kinmâ Kiristohâlen biwiyenŋe tiŋâk kepeim mannomai. Yawu manŋetâ Kutdânenŋe Yesuŋe aŋelolipŋe meyekmâ âwurem gewuap yan Awoŋnenŋe Anitâ yâkât senŋan kinŋetâ yekmu ârândâŋ otmu nine nanne baratne koko salek sâwuap.

Manman girawu manmunŋe Anitâŋe nenekmu ârândâŋ otbuap.

4 ¹⁻²Aiop, yuwu sâmbâ nâŋgâŋet. Manman girawu manŋetâ Anitâŋe yekmu ârândâŋ otbuap yakât den kâsikum yingimunŋe nâŋgâm lâum manmâ gai. Nen Kiristohât aposololipŋe orop biwinenŋe kepeiakmâ konohâk otmu mansain. Yakât otmâ yâkât sâtgât otmâ den pat âlepŋe ya ekyongomonŋe nâŋgâŋetâ keterakmu lâum manmâ gaŋetâ yekmunŋe tipiŋe âlepŋe oap. Ya torokatmâ tiŋâk lâum manŋetâ Anitâŋe yekmu âlepŋe otbuap. ³Yeŋe târârâhâk mannomaihât Anitâŋe nâŋgâmap. Yawu manmâ kâwâ konda ki otnomai. ⁴⁻⁵Lok belângen manmaiŋe imbi yekmâ tepyeŋe uk sâmbâ otmâ tâpikguŋetâ umatŋe tetemu yakât kakŋan miakmâ manmai. Yâkŋe otmai yawu ki otnomai. Yeŋeâmâ orotmeme tâŋ tâŋâk watmâ imbi meyekŋetâ lohimbiŋe nâŋgâyŋginetâ yahatbuap. ⁶Emelâk girem den âlâ yuwu ekyongomonŋe nâŋgâwi. Lok âlâ me âlâŋe bukulipyenŋe yengât imbi yekmâ otnomai yamâ Kutdâŋe yakât matŋe umatŋe yingimu menomai. ⁷Nenŋe Kiristohât mâtâp watmâ kâwâ konda ki otmâ mannehât Anitâŋe menenekmâ ikŋe Wâtgât mâmâŋahât Heak hâŋgângumu ge biwinenŋe mem hewewenŋe tuhomap. ⁸Yakât otmâ lok âlâ

me âlâne den ekyongoan yu betgunomai yamâ nâ betnohoain sâm Anitâ betgunomai.

⁹⁻¹⁰ Anitâhât Wâtgât mâmânjahât Heakne biwiyene mem hewewej tuhumap. Yawu otmu Makeronia hânân Kiristohât komot mansai ya orop biwiyenane kepeiakmâ konohâk otmu buku orangim mansai. Yawu otmâ mansai ya yawuâk torokatmâ otmâ mannomaihât nanjan. Emelâk yakât topne ekyongomunne nângâwi. Yawu gârâmâ nâne den kâlep ki kulemgum katyîngiwom. ¹¹ Emelâk den ekyongowin ya âlâkuâk ekyongomune nângânet. Yene lohotnan manmâ tat tat memeyene galemgum henjengum mannomai. Yawu manmâ ki konam im bukulipylene nem watyeknomai. Otmu bukulipylene yengât tat tat memeyene yakât nângâm ki engatyanan genomai. ¹² Yâhâ âi mejetâ yanâmâ manmanyene tetewuap. Yawu otmâ mannomai yan lohimbi belângen manmaîne yekmâ ewe katyeknomai.

Kutdânenne Yesu âwurem gewuap yakât sâop.

¹³ Bukulipne, lohimbi belângen manmai yengât sese buwulipylene me âwâ mâmâlipylene mumai yan “mujetâ pesuk yap” sâm isem we bâle nângâm manmai. Yene yawu otmaihât sese buwulipylene me âwâ mâmâlipylene Kiristohâlen biwiyenane kepeim manmâ gam muwi ya yengât sâmune nângânet. ¹⁴ Yesune muop yamâ Anitâne mumujambâ mem yahalop. Yakât dopneâk Yesune himbimâmbâ âwurem gewuawân lohimbine Kiristohâlen biwiyenane kepeim manmâ gam muwi ya Anitâne mumujambâ mem yahatyekbuap. Yakât nângâmunne bulâne otmap.

¹⁵ Otmu Kutdânenne Yesune aposololipne den kâsikum yîngiminiop yakât sâmune nângânet. Kiristone âwurem ge menenekmu himbimân yâhânom yan ikne lohimbi mujetâ hanyongowi ya meyekmu orowâk yâhânom. ¹⁶ Anjoân Kutdânenne ikne anelolipne yengât kunyene ekumu lâmun kunbuap. Lâmun kunmu Kutdâne himbimâmbâ gemu ikne lohimbi muwi ya mumujambâ yahatnomai. ¹⁷ Mumujambâ yahatjetâ orowâk elem kakjambâ yâhâmunne Kiristone ge hanân peneningiwuap. Hanân peneningimu yâk orop tatmâ yâhâmbisâin. ¹⁸ Otmu biwinnenne gemap sâm yakât nângâm alahum biwi sânduhân karakmâ mannom.

Kutdânenne âwurem gewuap yakât biwi golâek otmâ mannom.

5 ¹ Kutdânenne pârâk sânsânâk âwurem ge menenekbuap yan kulem girawu tetemu ekmâ nângânom ya emelâk ekyongomunne nângâwi. Yakât otmâ den kâlep ki kulemgum katyîngiwom. ² Kutdânenne gewuap yakât den âlâen hâum sâmune nângânetâ keterakyîngiâk. Kapi ambolipne yengât kasalipylene sâp girawuân taka itit kiom tuhuyînginomai ya ki ekyongomai. ³ Kapi ambolipnane “Nen gulip mansain,” sâm otjetâ yan kasalipylene taka pârâk sânsânâk yongom kiom tuhuyîngimai.

Aiop, umatŋe ya kaknenŋan yâhâmap sâŋm mâtâp ya maŋgunomaihât dop ki tap. Yakât topŋe nâŋgâŋetâ keterahâkgât imbi tepdâ yengâlen hâum sâŋmune nâŋgâŋet. Imbi tepdâŋe naom mene sâŋm otmai yan naomŋe hâliliakmâ tatmu hâhiwin nâŋgâm belângen memai. Yakât dopŋeâk umatŋe ya kakyeŋan yâhâmu hâhiwin nâŋgânomai. 4-5 Bukulipne, Kutdâŋe âwurem gewuap yakât emelâk ekyongomunŋe nâŋgâŋetâ haŋ sâyiŋgiop. Yawu gârâmâ yakât topŋahât ki pâpŋum mansai. 6-7 Lok nombotŋaŋe biwi pâlâmŋe manmâ to kârikŋe nem hâlim milim otmai. Yawu otmai yakât umatŋe topŋe topŋe kakyeŋan yâhâwuap ya ki nâŋgâmai. Yâhâ yeŋeâmâ mambotbaŋgim biwi golâek mannomai yanâmâ pârâk sânsânâk takamu ki pârâk pilânomai. 8 Otmu biwiyeŋe galemahom yuwu mannomai. Lohimbi belângen manmaiŋe mem bâleyekŋetâ biwiyeŋe gemapgât Kiristohâlen biwiyeŋaŋe kepeinomai. Me yeŋe sâŋm bâleangim hioŋakmai hât biwiyeŋaŋe kepeiakmâ konohâk otmu buku oraŋgim mannomai. Yawu otmâ Kutdâŋe âwurem ge meyekmâ manman kârikŋan katyekbuap yakât nâŋgâm biwiyeŋaŋe mem mannomai. 9 Anitâŋe lohimbi kerek nengât manmannenŋahât matŋe âlâku ikŋiâk ikŋiâk kâpekningiwuap. Sâp yanâmâ lohimbi belângen manmâ orotmeme bâleŋe otmai ya matŋe umatŋe yiŋgimu mem hâhiwin kakŋan manmâ yâhâmbisâi. Yâhâ yenâmâ nen orop Kutdânenŋe Yesu Kiristoŋe sâreerenekmâ manman kârikŋan katnenekbuap yakât Anitâŋe sâŋm kalop. 10 Kiristoŋe kawenenŋan kinmu kuŋetâ muop. Yakât otmâ yâkâlen torokatmâ manman kârikŋan mannom. Yakât otmâ manmunŋe gewuap me mumunŋe gewuap sâp yan menenekmu yâk orop atmâ yâhâmbisâin. 11 Yakât nâŋgâm biwinenŋe gemap sâŋm sâp yiwerenŋe tânahom biwi sânduhân karakmâ mansai yawuâk otmâ yâhânomai.

Pauloŋe girem den ekyongop.

12 Nenŋe Kutdâhât sâtgât otmâ lok meyekmâ galemयोगom den kâsikum yiŋgiŋet sâŋm katyekbin ya ewe katyeknomai. 13 Galem yaŋe âi ya biwiyeŋaŋe tiŋâk mem mansai yakât otmâ nâŋgâyiŋgiŋetâ yahatmu buku otyiŋgiŋetâ yâk orop buku konok otmâ mannomai.

14 Lohimbi nombotŋaŋe konam imai ya sâyiŋgiŋetâ âi tuhunomai. Otmu lohimbi nombotŋe biwiyeŋe orotok sâmu mansai ya mem hewewenŋe tuhuyekŋetâ biwiyeŋe ârândâŋ otbuap. Otmu lohimbi nombotŋe Anitâhât den ki nâŋgâm heŋgeŋgumaiŋe orotmeme inŋe ya otmunŋe mem bâlenenekmap sâŋm gorâyiŋgimap. Lohimbi yawuya Anitâhât den topŋambâek kâsikum yiŋgiŋetâ nâŋgâm mannomai. Otmu lohimbi nombotŋaŋe mem bâleyeknomai ya lohotŋan otyiŋginomai. 15 Lohotŋan otyiŋgim matŋe ki kâpekyiŋginomai. Yawu otmâ buku oraŋgim tânahom mannomai. Otmu lohimbi belângen manmaiŋe mem bâleyeknomai ya yawuâk mem buku tuhuyeknomai. 16-18 Otmu wuân

me wuân teteyiŋgiwuap yan haorŋmâ ârândân Anitâhât heronje nâŋgâm mepaembisâi. Orotmeme yu otmâ Kiristo orop biwiyenaje kepeiakmâ konohâk otmu mannomaihât Anitâŋe nâŋgâmap.

¹⁹⁻²⁰Otmu Wâtgât mâmâŋahât Heakje lok âlâ me âlâ lauyenje mem hewewerj tuhuyekmu den ekyongoŋetâ nâŋgânomai. Yakât ki nâŋgâŋetâ gemu kuyiŋginomai. ²¹⁻²²Lohimbi âlâ me âlâŋe den ekyongoŋetâ nâŋgânomai me orotmeme âlâ otŋetâ eknomai. Yawu otŋetâ yaje Anitâhât den orop lâuakdomawot me bia sâm yakât ekmâ kiwilim heŋgeŋgunomai. Lâuakdomawot otmuâmâ ya nâŋgânomai. Yâhâ ki lâuakdomawot otmuâmâ ya ki nâŋgânomai.

Den bâiŋe sâop.

²³Anitâ Biwi Sânduk Amboŋaje manman bâleŋe yapâ meyekmâ biwi nâŋgân nâŋgânyeŋe galemgumu târârâhâk mannomaihât nâŋgâm ulitguman. Yawu mannomai yan Kutdânenŋe Yesu Kiristonje âwurem ge yekmu ârândân otbuap. ²⁴Anitâŋe ikŋahâk meyehop. Yakât otmâ yeŋe yâkât wâtŋan manmâ yâhâm sâp patoen Kiristohât senŋan koko salehâk kinnomai.

²⁵Nengât sâm Anitâ ulitgunomaihât nanŋan.

²⁶Anitâ yet Kiristo yetgâlen biwiyenaje kepeim mansai yeŋe heronje nanŋanŋinomai.

²⁷Den yu Kutdâhât sâtgât otmâ kulemgum katyiŋgian yu sâlikum bukulipyenje ekyongoŋetâ kerekje nâŋgânomai. ²⁸Kutdânenŋe Yesu Kiristo tihitnenŋe otmapŋe yen orop tatmu yâkât wâtŋan manŋetgât Anitâ ulitguman. Bâiŋ.

Nâ bukuyenje,
Paulo